

24. okt. 2016

Atuarfinni sorlerni meeqqanut inuusuttunullu ajornartorsiutitik pillugit saaffigisinnaasaminnik amigaateqarnersut pillugit, amigaatillu taakku qanoq iliuseqarfigineqarsinnaanersut pillugit pilersaaruteqartoqarnersoq aallaavigalugu Naalakkersuisut UPA 2017-imut nalunaarusiornissaannik suliniuteqaqqullugit Inatsisartut aalajangiiffigisassaattut siunnersuut

(Inatsisartunut ilaasortaq, Anthon Frederiksen Partii Naleraq)

Aalajangiiffigisassatut siunnersuut soqutiginarloq pillugu siunnersuuteqartoq Anthon Frederiksen Siumumiit qutsavigiumavarput.

Qujassutigisariaqarparput meerartatta inuusuttortattalu atugaat pillugit politikikkuinnaangitsoq, aammali meeqqat illersuisuata suliaminut assigiinngitsutigut oqariartuuteqartarnerata nunatsinni soqutiginnilersitsineq siammasinnerulersittutut isikkunitsimmagu. Innuttaasunullu alapernaarnerulernerq paasisa qarusunnerulernerlu ilanngullugit annertunerulersimmagit.

Meerartatta pisuussutitut taajortuaannakkatta ullumikkut qanoq amerlatigisut angerlarsimaffiminni tujormisarnerat tusakulallugu assorsuaq alianartuuvoq. Inersimasut iliusaasa kinguneragut meeqqat eqqugaasarnerat akuersaarneqarsinnaanngilaq. Akisussaassuseqarneq perorsaanikkullu pitsaasumik maligassiuinnaaneq angajoqqaat pimooruttariaqaraat kaammattuutigerusupparput.

Kommunit akisussaaffeqarput, pisussaaffigaallu innuttaasut qanimut pitsaasumik sullinnissaat. Isumaginnittoqarfiup iluani susassarineqartut taakkuupput inuttut aporfiusut pillugit sullissisussat. Siumut pingaartilluinnarpaa pingaartumik meeqqat pineqartillugit piaartumik naapertuuttumillu sullinneqarnissaq, ullumikkulli kommunit qanoq suliassanut killissimanerat arajutsisimanngeqaarput. Taamaattumik aperisariaqarpugut ilumut meeqqanut suliassanut tunngasut Inunnik isumaginnittoqarnermut ulapinnerpaanut suliassanngortittuaannassanerigut? Tamanna tulluurtuusorinngilarput, taamaattumik allatut iliortoqarnissaa Siumumiit ammaffigivarput. Kommunillu namminiussuseqarnerat aallaavigalugu aalajangiisinnaanerat taperserparput. Kommunit ilaanni atuarfinni siunnersortinik atorfinitsitsineq atornerqarpoq, taamaattumik Kommunit pisussaaffeqarmata tamatuminnga atuinissamik kaammattorusuppavut.

Naalakkersuisut siunniuppaat kommunit qanimut suleqatigalugit aamma sulianik ingerlatsiviit sulianut attuumassuteqartut, pingaartumik inunnik isumaginnittoqarfiup, peqqinnissaqarfiup ilinniarti-taanerullu akornanni ilisimasamik paarlaaseqatigiinnissamik katersinissaq. Siunnersuuteqartullu oqariartuuteqarnera Siumumiit aamma maluginiarsimavarput. Taamaattumik ernumaneq paasisinnaalluarparput.

Naalakkersuisut akissuteqaatsiminni suliniutit taareeraluaraat, taamaattoq Anthon Frederiksen ernumanera paasisinnaalluarparput. Annertunerusumik qulaajaasoqarnissaa soqutigaarput, taamaat-



SIUMUT
INATSISARTUT

tumik Ataatsimiititaliamut susasaqartumut suliassanngortinnissaa innersuussutigissavarput
Ataatsimiititaliallu sulilluarnissaannik kissaallugu.

Laura Táunâjik

Siumut